

INI A/S-ip, Illuut A/S-ip kiisalu Namminersorlutik Oqartussat illuutaannik aallaqqaataasumik akiliutigineqartartut kattunneqarnissaat pillugu Naalakkersuisut UPA2019-mut pilersaarusoqqullugit peqquneqarnissaannik Inatsisartut aalajangiiffissaattut siunnersuut.

(Inatsisartuni ilaasortaq Aqqaluaq B. Egede, Inuit Ataqatigiit)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Aallarniutigalugu Naalakkersuisut sinnerlugit Inatsisartuni ilaasortaq Aqqaluaq B. Egede Inuit Ataqatigiinneersoq aalajangiiffigisassatut siunnersuuteqarneranut qutsavigerusuppara.

Tassunga tunngatillugu ilisimatitsissutigineqarsinnaavoq, INI A/S aqutsiviummat, Namminersorlutik Oqartussat kommunillu inissiaataannik aqutsisusooq. Taamaattumik inissiat INI A/S-imit aqunneqartut ingerlatseqatigiiffimmit pigineqanngillat. Kisiannili Illuut A/S-ip inissianik nammineerluni pigisaqarpoq, inissianik aqutsineq Agerskov A/S-imit isumagineqarluni.

Aningaasanut inatsisini kingullerni Naalakkersuisut Namminersorlutik Oqartussat inissiaataannik kommuninut tunniussinissamut isumaqatiginninniarnissamut Inatsisartunit piginnaatinneqarput. Tamatumani pisortat inissiaataat kommuninut katersuutsinniarneqarput, taamaalillunilu pitsannguiniartoqarluni pisariillisaaniartoqarlunilu. Taamaalilluni marloqiusamik aqutsineq pinngitsoorneqarsinnaammat.

2017-imi ukiakkut ataatsimiinnermi piginneqatigiilluni inissiat pillugit Inatsisartut inatsisaat aamma inissianut aningaasalersuisarneq pillugu Inatsisartut inatsisaat akuerineqarput. Ukiq manna ataatsimiinnermi sanaqateqarluni illulianut taarsigassarsititsisarneq pillugu Inatsisartut inatsisissaattut siunnersuut suliarineqarpoq. Tamanna ineqarnermi aqqissuusseqqinnerup annertunerusup ilagissavaa, tassanilu suleqatigiissitamik pilersitsisoqarpoq, attartortitsisarnermut inatsisissamut nutaamut tunngaviusussanik inassuteqaatinillu suliaqartussamik.

Suleqatigiissitaq pilersinneqartoq aamma ineqarnerup siunissami ilusissaanut inassuteqaatinik saqqummiussisussaavoq. Suleqatigiissitaq ilaatigut INI A/S-ip piginnittoqarnissaanut siunnersuuteqartussaavoq inassuteqaateqartussaallunilu, taamatullu Illuut A/S-ip inissiaataannik kommunimut tunniussisoqassanersoq inassuteqaatinik suleqatigiissitaq saqqummiussisussaavoq.

Suleqatigiissitap ineqarnerup siunissami ilusissaa misissuiffigisussaammagu, ineqarnerup ilusissaanut nassuiaammik siunnersuummillu ataatsimoortumik saqqummiussisoqareertinagu, INI A/S-ip aamma Illuut A/S-ip kattunneqarnissaat naapertuutinngilaq.

Ilisimatitsissutigineqarsinnaavoq, ullumikkut attartortitsinermi isertitat 21%-iisa missaat aningaasaatinut iluanaarutitut tutsinneqartarmata, 68%-iisa missaat ingerlatsinermut

aserfallatsaaliuinernullu tutsinneqartarmata aammalu 11%-iisa missaat INI A/S-ip aqutsineranut akiliutitut tutsinneqartarlutik. Namminersorlutik Oqartussat najugaqarfiutaanni 2018-imut missingersuutini pilersaarutaasumik piffissalikkamillu aserfallatsaaliuineranut (PPV) illuartitat 51,2 mio. koruunit missaanniipput.

Kommunit pisortat inissiaataannik attartortittakkanik tamanik piginnittunngortinneqassappata, kommunit siunissami ilusiliussassamut sulianut akuutinneqarnissaat pingaaruteqarpoq. Ullumikkut kommunit aqutsisuunissamik kissaateqarnerlutik aammalu kina suliassamik taassuminnga isumaginnittuussanersoq namminneerlutik aalajangiinissartik pisinnaatitaaffigaat. Tamatuma aamma siunissami atuunnissaa naatsorsuutigineqarpoq.

Taamaattumik siunissami kommunit inissiaataannik aqutsisuusussaq tassaasariaqanngilaq INI A/S. Taamaattumik suliniutinik qanorluunniit ittunik aallartitsisoqannginnerani ineqarnerup siunissami ilusissaata kiisalu ineqarnermi aqqissuusseqqinnerup aalajangersarneqarsimanissaat Naalakkersuisut pingaartippaat.

Matuma siuliani taaneqartut peqqutigalugit siunnersuutip itigartinneqarnissaa Naalakkersuisunit inassutigineqarpoq.